

編號 1 號

【自家大自家】林伯殷原作

該係麼人？仰會電視逐日有厥个新聞？仰會有恁多人請佢簽名？仰會有恁多人聽佢演講？係哪齣電影个明星？係哪個有名个歌星？抑係哪種職業運動个球星？全毋係。佢係一間有名公司个執行長，來臺灣同大家分享人工智慧个發展，同時，乜有其他重要晶片公司个執行長，來參加臺北電腦展个活動。做麼厥等會跔跔對外國來到臺灣呢？當然有理由啊！該斯係，臺灣有全世界盡先進、盡完整个晶片製造系統。

在世界晶片个分工系統肚，臺灣盡強个部分係晶片製造，差毋多，盡新設計个晶片，做下係交分臺灣來生產。現代晶片个發展係越做越幼工，功能越來越強。晶片製造公司為著愛開發新个製造技術，輒輒會投入大量資金，集合幾下百、甚至幾下千個人來做研究，斯係講，愛大自家為共同个目標來打拚正有法度做得著，這同單淨倚恃自家煞猛做頭路來講，有當大个爭差。

所以，有名个晶片公司執行長毋會單淨強調自家公司產品个成功，還會記得勞瀝好得有臺灣恁湛斗、恁有紀律个晶片生產團隊來幫襯。見擺上下班時間，想著該恁多在科學園區來來去去个

人，斯知，若無大自家个努力，臺灣仰會有恁好个晶片製造能力，仰會受著國際个恁多肯定。

隨核晶片个用量緊來緊大，恁多年來，已多原旦係客人耕種个山林、田坵既經變做電子廠同大樓，想看著頭沉沉做事个農家人，來思念自家个長輩都無恁該。毋過，這種自家認分，恬恬同事情做好，堅耐个精神，對農業時代變到資訊時代了後並無失撇去，像人也毋識離開過原來个所在，還係日合夜繼續留在廠房裡肚。這兜同臺灣合作个晶片公司執行長，認為自家堅耐个傳統，斯係臺灣晶片製造个正經基礎。

現代工業產品既經離毋開晶片咧，臺灣个晶片公司乜有去到美國、日本、德國這兜先進國家設廠，偲等个工程師乜跔核去到世界各地，大自家同晶片製造技術傳揚出去个時節，乜分人過較有機會使得來感受著臺灣人堅耐个精神。

編號 2 號

【坐米籬沾屎脰】徐姿華原作

頭擺，阿爸在河壩埔有一埕地，種枇杷同鸚哥桃，還有幾下個莊肚个阿叔、阿伯也在該種兜楊桃、葡萄、李這兜。

河壩个枇杷園較平洋、好做事，毋過，愛去枇杷園還有一項挑戰，斯係愛坐流籠過河壩；河壩水又大又急，有三、四十公尺闊，這兜阿叔、阿伯也識探過幾下到竹笕橋，毋過，毋使幾久斯會分水打走。高不將，大家出錢出力拉一條鋼索做流籠，正起勢係用大米籬編麻索，過秦鐵線圈做流籠，還愛用人去拉；尾下，正改用電動个白鐵籃流籠。

第一擺坐流籠又驚又好，阿爸先溜過河壩埔該向，阿姆同流籠拉轉來，揪核索喊佢入米籬項坐好，過同做事愛用著个傢啦伙、水同飯包，做下放入米籬肚，斯同阿爸攞手，順勢同米籬撻出去。該流籠溜當遽，一下斯溜到河壩中央，佢著驚下「噯」都大嫲聲，阿爸續緊出力擲，同佢擲到厥身邊。等嚇都面壑青个佢踏出米籬，過同東西拿拏了後，換阿爸同阿姆攞手，阿姆將流籠拉轉去，正坐核流籠同阿爸兩片向撻拉，當拏斯過河壩咧。

萬事起頭難，有經驗了吾膽斯較在咧，曉得享受坐流籠个趣

味咧！該咻聲下，斯溜到一、二十公尺遠个刺激，好比這下个雲霄飛車；去河壩个枇杷園撻手，有好坐兩掖个流籠，這係分佢盡好个獎勵。

熱天个下晝頭，輒輒會打西北雨，雨若較早落，吾等斯歇睏下等雨停正過做，若雨較暗正落，阿爸斯會放工轉早夜。有一擺，四點空落大雨，阿爸看做毋成事咧，斯喊大家收收嚟，愛轉咧！

去到流籠頭，堵著核緊葡萄个阿平叔，地泥項還放一擔，佢本來按算自家拉四掖流籠，同葡萄載轉屋家，熱心个阿爸斯同佢撻手，一儕同一籠葡萄共下坐過河壩。雨緊落，河壩水緊漲跣來，大人企在大米籬肚緊拉索過河壩；換佢愛過河壩咧，阿姆喊佢愛坐好。到河壩中央，該水嘎浸著米籬底，吾个屎脰一下斯沾著該冰冰涼涼个河壩水。看緊該黃泥色个大浪拋緊來，實在當得人驚，佢忍緊毋敢噉，真無簡單正耐到岸脣。

這下想起該坐米籬沾屎脰个事，好笑又心酸。阿姆講該當時，等在流籠頭个佢，也驚佢分水打走，硬硬忍敷一層皮咧呢！

編號 3 號

【目汁个故事】徐秀英原作

該日下晝，看著一張當錫人个圖像——顯微鏡底下个目汁花。逐張目汁花看疏來斯像一粒細星球，頂頂个花形逐粒都無共樣，有像雪花形个，有像石英結晶體个，也有像難毛蟲个，奇妙又得人惜。攝影个作者講，每一滴目汁，用目珠看做下係晶亮晶亮，毋過在顯微鏡下，喜怒哀樂个情緒變化都會顯現出無共樣个目汁花。自看過這篇文章了後，逐擺看著人出目汁，斯會緊恤該背後个故事。

佢係一個「噉點」當低个人，歡喜該下會流目汁、感動時節會跌目汁、當譴个時會噉、悲傷个時會大噉。屋家人長在笑佢，目珠有安水道頭，一擰開斯嘩啦啦緊流，毋過難免會堵著想噉無目汁¹个時節。像有一擺用電腦打報告，作業速度一路開青燈，斯在會完成个時節電腦嘎故障，看核烏疏疏个螢幕，斯像吾烏疏疏个失落心情。等到過開機，資料單淨伸一半，該當時斯恁泥目金金，看核在三光半夜，歸屋家人睡到當落覺，斯伸佢緊擘哈，緊流出懊惱个目汁。

目汁係佢等同外界聯絡情感个一種表達方式。所以，所有个關愛、期盼、悲傷、感動抑係夢想个故事，都使得真實傳達。在佢等个生活裡肚，輒輒也會在車頭抑係機場，看著一幕幕無共樣个場景。該片有人送別親人遠去他鄉，離別个目汁張緊思念同期待，又還有當多个掛吊同毋盼得；這片有人摘核轉來个好朋友，該歡喜个目汁裡肚，淦淦都係重逢个快樂同幸福。佢恤，目汁毋單淨係情感个出口，還有一種無形个力量，使得穿過時空，傳達燒暖同勇氣分思念个人。每一滴感動个目汁，都係關愛个力量同信念。

還細時節，自家當會用起頓屈、打潑賴，去得著想愛个東西。阿姆講，目汁毋係武器，也無應該係手段。這下佢知咧！目汁係珍珠、係鑽石、係親戚朋友無私个愛。

¹ 想噉無目汁：音 siong^ˋ gieu^ˋ mo^ˋ mug^ˋ zhib^ˋ；欲哭無淚。

編號 4 號

【岔東岔西】徐汎平原作

記得讀小學該下，日日都同搞伴共下行路去讀書。無半點鐘个路程，細人咩！哪有好認分乖乖行？總會搵兜齣事來搞。摘花草、捉蟲蛎，該還無準算¹，大路頂个車來來去去，吾等斯會看準車影，等佢一過斯跳趯來！麼人係踏著抑徑著影斯算輸，愛分贏个人拘額頭。

放轉²該下，除撇丁入雜貨店買冰食，幾個人還會湊緊去行細路、行田脣，堵著路口斯轉幹、過轉幹，三十分鐘个路，硬硬行撇歸點鐘正轉到屋家。大人講：「哼！拈揚尾、打草蜢，岔東岔西，愛行若³毋行！」佢有行啊！行較久得。

到大咧，不管去到哪個新城市生活抑遠寮，佢本本當好大街、細路、小巷滿哪串上串下去探路、看風景。當記得有一擺，自家一個人坐巴士去九份寮，遠過金瓜石黃金博物館，又跋上長長个礮去看神社个遺跡。九份該盡有名个老街鬧熱濟借，一踏入去斯同人尖上尖下相極⁴。總算對街尾鑽出來咧！心肝肚一屑都無

¹ 無準算：音 moˋ zhunˊ sonˋ；不算數，指除此之外，還有更甚之事。

² 放轉：音 biongˋ zhonˊ；放學回家。

³ 若：音 na+；好似，此句意為「要走不走似的」。

⁴ 相極：音 siong+ kidˋ；與人互相推擠。

想過再對原路躡⁵轉去！

這時節，堵好看著某某步道个牌，該無斯來去行下看好咧！斯跔礮上。無想著，一行起勢，嘎行入山肚去咧。除撇盡打先看著一個像仙人樣个老阿伯、過後過堵著一細陣人，歸個山林斯淨伸著蟲叫、鳥聲同清風，還有自家个故氣聲。一下溜崎、一下上崎，遠遠有一細搭頭擺人留落來个屋跡，看著有兜淒涼。頓腳下，臥頭看天，日頭轉影咧，這……到底愛行去哪呢？摸緊哼哼跳个心肝，到這下正感覺著：「哎哟！膽膽⁶哦！」好得，轉一個幹，堵著林肚个細伯公廟，打幫伯公指路，過無幾久，斯行到另外一頭个登山口咧。

出啊來，翻轉頭詳細看告示牌，正知講這條山路安做「小粗坑古道」！吉落山个日頭，同猴硐國小面前、基隆河兩脣个娘花⁷晟到金哲哲。偃斯在這燒暖个冬下頭，踏在像用金鋪設个大路項，一路行到猴硐火車頭。過後，又跔緊「貓村」个貓遊遊野野一站，正甘願坐車轉屋。

哼！岔東岔西，毋行斯毋行，一行嘎害人心驚！十年前个戇膽⁸，這下斯毋敢咧！

⁵ 躡：音 liung+；竄、鑽。

⁶ 膽膽：音 damˊ damˊ；內心感到怕怕的。

⁷ 娘花：音 ngiongˋ fa+；甜根子草花。

⁸ 戇膽：音 ngongˋ damˊ；因為無知、不作多想而有的勇氣。

編號 5 號

【聽古】廖惠貞原作

還細時節戴外阿公屋脣，輒輒會跔核阿太滿哪邊。阿太成下會帶一、兩個息嫲坐三輪車轉去海口厥妹家，逐擺都會去漁港擱一大籃个魚轉來。無食撇个，舅姆斯會用鹽滷做鹹魚，恁泥使得食幾下日著。

還記得熱天食飽夜，在天墀坪，阿姨同草蓆攤開，交椅、矮凳徙好，伙房个叔婆、伯公乜擎核葵扇，出來寮涼。阿太會擘地豆，成下細姪乜會搵手。細阿舅會同地豆莢擘開一半，夾在吾等耳砵，做耳環戴，愛靚斯毋驚疾。莊項一大片係禾田，大人儕大概會講耕種个事，弓蕉仰脣翕畀熟，洋菇愛仰脣淋水，打胎个禾分塑膠工廠噴著煙，禾串冇撇愛仰結煞？阿三姑婆个豬嫲愛養子哩啲！無斯講頭擺个事，搞寮个細人會停落來，耳角角聽，因為大家都好聽古，尤其係阿定伯公來寮个時節。

有一擺阿太老癲俵，玄玄風講愛帶吾等去海口捉魚，堵好該暗晡阿定伯公來寮，佢乜講頭擺戴在新屋永安漁港脣，還細時節，臨暗邊輒輒會跔大人去沙灘牽網捉魚，阿爹先問：「阿定哥，若等仰脣知愛去牽網呢？」

「有里長伯會歎嘯¹啊！」阿定伯公驚大家毋知歎嘯个意思，又解說講：「海螺殼个尾項削兜撇，對尾項大聲歎，斯有嘯嘯嘯——个聲，大大細細聽著嘯聲斯遽遽走出來搵手，分做兩片牽網，大聲緊喊『一、二、三，出力拉！』該搭海陸人較多，厥等講牽罟²。」

「阿定伯公，係恁泥牽網無？」細阿舅當興頭做出拉網動作，大家哈哈笑。

因為一般客人都戴山項，人講：「逢山必有客，無客不戴山。」雖然還細識去海口漁港，毋過無看過牽網。阿定伯公講：「偲客人盡擔硬，靠山食山，靠海食海，鄰舍同屋家人半耕種半打漁，生活還過得，乜愛靠天公同祖公个庇佑，所以偲客人斯尊敬天，感恩田地、大海同祖公哦！」大家做下聽都當入文。

聽阿定伯公講古，想像厥等協力耕山耕海久遠个古，有節奏个海螺歎嘯聲，大家共下出力牽網收魚，看霞痕染在海面、日頭落海肚，歡喜講笑共下分魚食，家家屋屋斯有豐沛个暗餐，這係頭擺漁村生活幫搵个記憶。聽阿定伯公講老頭擺个古，使得感受著客家硬頸打拚个精神。

¹ 歎嘯：音 punˋ duˊ；吹海螺。

² 牽罟：音 kien+ gu+；以漁船、曳地網、人力合力捕魚的方式。

編號 6 號

【柿情】徐熏嫻原作

毋多知又到立秋个節氣，大自然也定定換山色。逐年秋天，見看著山排背个柿漸漸熟水，心肝肚也燒暖起來，斯像阿爸惜子个心，囡在人生个記憶肚轉紅。

這片柿林，係阿爸在偌出世該年在屋背種个。記得阿爸講：「這兜柿樹跔你同年，你幾多歲，柿樹斯有幾多年哦！」恁想阿爸係仰脣用心來耕種，一冬過一冬个牽成，除撇逐年加減有好收成，還畜飽一陣牛倮¹肚飢个童年。

樹頂个柿恬恬轉到柑紅色，同歸頭樹染到紅啾啾。看著這兜啾紅个紅柿掛在高天天个樹頂，跔風晃來晃去已打眼，斯想著還細時節，兄弟姊妹跋到樹頂摘柿个情景，斯像一陣細猴滿樹爬个生趣畫面，一下工歸頭个柿總下剿淨淨²，半粒都無伸。

阿爸个汗水係有機肥料，正使得打出恁結又大嫻粒个柿。這兜柿毋單淨錫人食，還特別錫鳥無斯膨尾鼠來搶食。看著硬硬斯有好落嘴个果子噯分這兜生靈食撇，吾心肝肚當然係毋願分厥等來偷食，所以輒輒囡在樹頭下逐鳥、嚇膨尾鼠。這兜事頭斯變做

吾等細人落力个大事。

有一日下晝，看著阿爸攢緊家濟行去柿園，緊怵著阿爸也愛去嚇鳥，斯跔在厥屎背尾扭啊扭走緊去，無想著阿爸拿出紙絡，同樹頂大約五股三个柿包疏來，伸个斯留分大自然个動物食。

偌看去呆呆，阿爸笑笑講：「無相干！人生賺毋罇，食毋罇脰。耕種人原旦斯愛看天絡食，有能力種得來食，分一屑分生靈食也係一種福氣！」還毋知頭天个偌哪聽得識麼个係「看天絡食」，總知該係阿爸透風落雨辛苦守顧正有好食个果子。

柿熟水个季節，阿爸噯無在咧！同柿摘落來張落袋³，斯想著阿爸分日頭晒去紅紅个面頰卵，該係一種深深个思念。這兜柿樹年視年定定老，今這下有鳥在樹頂做竇，膨尾鼠還係喀喀滾……湊伴來搶食，看著萬物生生不息个生命力，斯像阿爸傳承个柿情。偌企在這埕土地項，正感受著麼个係「少食多香氣，多食無味瑞」个人情味。

¹ 牛倮：音 ngiuˋ leuˋ；頑皮的小孩。

² 剿淨淨：音 sauˋ ciangˋ ciangˋ；被搜刮光了。

³ 張落袋：音 zhong+ logˋ toiˋ；裝進袋子裡。

編號 7 號

【來去坐巴士】蕭瑞琪原作

這日閒閒無事，想著已久無坐巴士咧，擇日毋當撞日，該斯來去坐莊頭巴士遶遶嚟！

莊頭巴士主要係為著服務交通較毋利便个莊頭，分莊民出外辦事、看病、買東西抑係去車頭盤車；或者分學生坐去學校讀書；也使得分來莊頭个觀光客深入在地遶寮。中型个莊頭巴士使得行較細條个路，去到較壁壘角¹个所在服務。

一上車，一個頭那毛蓬白个老伯姆已好意講：「後背有位哦，遽遽坐落來。」一個中風个老阿伯，雖然手腳毋生活，毋過一路講笑科分大家人聽。還有一個精神無嘛好个老人家，恬恬坐在車門脣，目聚聚看大家打嘴鼓。車駛到醫院門口，還緊講話个老阿伯同老人家愛落車，老伯姆又開嘴講：「毋好緊講話緊落車，看好勢正行。」司機當有耐心等到兩儕落車了，車正駛停動。看司機熟絡左幹右幹，一下鑽入細巷，一下又駛出大路項，有時跔緊鮮鮮河壩水个大圳行，有時跔核青溜溜个田坵走，一等生趣。

¹ 壁壘角：音 biag^ˋ lag^ˋ gog^ˋ；角落。

還有四個八、九十歲个老人家，對美國轉來掛紙，跔跔坐巴士來這講熟事又無已熟事个家鄉遶寮。厥等去美國打拚五、六十年咧，講个客話還當正板，毋過對緊變化恁大个家鄉，印象也既經濛濛咧。好得司機毋單淨駛車技術一等，也係已登真个解說員。歸路紹介解說，四個人聽去緊領頭，煞猛同頭擺个記憶同眼前看著个風景連跔來。有人講：「日久他鄉變故鄉。」毋過對家鄉个感情，永久囤在心肝頭，毋管在他鄉打拚，抑係在家鄉生活，都係為著人生使得還較歡喜圓滿。

恁著頭擺去外背讀書，寮日愛轉屋家，坐个巴士做下尖去撈撈个²人，無位好坐還無打緊，下把尖去連掣³都毋使掣，歸車个人企去壁磴轉鉸毋得⁴，淨跔緊車搖搖盪盪⁵到落車。若毋係為著轉屋家，實在無恁大神氣⁶恁泥同人尖車。等到自家會駛車咧，斯當少過坐巴士咧。毋過，換一個無共樣个方式出入，也當生趣。

來！來去坐巴士哦。

² 尖去撈撈个：音 ziam⁺ ki⁺ zad^ˋ zad^ˋ gai⁺；擠得滿滿的。

³ 掣：音 man⁺；扶著、抓住。

⁴ 轉鉸毋得：音 zhon^ˋ gau^ˋ m^ˋ ded^ˋ；不能轉動。

⁵ 搖搖盪盪：音 rheu^ˋ rheu^ˋ tong^ˋ tong^ˋ；搖搖晃晃。

⁶ 無恁大神氣：音 mo^ˋ an^ˋ tai^ˋ shin^ˋ ki^ˋ；沒那麼大精神。

編號 8 號

【月臺】周昱原作

「美濃山川，靚靚風光；醺醺茶香，四季飄揚；勤儉個人，煞猛耕耘；美濃之歌，唱盡鄉情。」美濃，係吾个故鄉，這項有醺醺個人情味，有親切、樸實个客人。高中畢業來彰化讀大學，對毋識離開屋家恁久又恁遠个厝來講，屋家嘅變做係吾深深个掛念，所以，寮日定著愛轉美濃。因為正來到生份个環境，還當毋慣，更深夜靜在宿舍看書時節，總會恁想：「還有幾多日正使得轉去？」「過加幾日斯使得食著阿奶煮个菜咧！」

月臺，係厝逐禮拜都會踏著个所在，毋過，轉鄉同離鄉个月臺嘅分厝有兩種當無共樣个感受。寮日轉美濃，坐兩點零鐘久个火車轉到高雄，踏著月臺該下，總會有一種講毋出个感動，該係「厝轉來咧」个歡喜；等到寮日結束，愛倒轉去彰化个時節，爺哀送厝去到火車頭，雖然踏在共樣个月臺項，毋過，心情嘅係毋甘願个，這係「厝又愛離鄉咧」个傷心。

逐擺愛行入月臺个時節，阿姆總係含緊目汁三交代四吩咐：「自家一個人在外背愛注意安全」、「在外背毋好同人冤家、結冤仇」、「暗晡頭睡目毋好踢被哦」。頭擺同爺哀共下戴个時

節，總係試著阿姆當唸唸、已煩，所以，見擺聽著阿姆个嘍嘍聲，厝斯會毋歡喜應講：「好啦，愛講幾多擺呢？」這下恁著，試著自家實在當不孝，該句話應該一到過一到刺著阿姆个心。

離開爺哀出外讀書過後正發現著，原來阿姆个嘍嘍聲恁燒暖。老古人有一句諺語講：「爺娘惜子長江水，子想爺娘擔竿長。」這下正經分厝深深感受著，爺哀關心子女个心，遠遠超過厝等對厝等个關心，都算厝等既經大漢咧，在爺哀个心肝肚，永遠還係旨大个細人。

老古人還有一句話講：「在生食四兩，當過死後祭豬羊。」爺哀單淨一個，跔緊厝等成人大漢，正發現著厝等既經鬚毛並白，使得陪厝等个時間也緊來緊少。厝定著愛好好珍惜同爺哀共下个時間，不管幾無閒、課業分人幾懊躁，寮日，定著愛轉屋家同阿爸、阿姆、阿奶、阿太共下。都算有朋友招厝出去寮，厝也會同厝等講：「敗勢啦！厝想愛同寮日个時間留分屋家人。」

編號 9 號

【一領學生衫】黃美貞原作

該年个新冠疫情，對一陣畢業生盡大个遺憾，斯係大家淨使得在網路項講再會，無法度同同學共下參加畢業典禮。

有一日，大學三年生个阿德收著母校寄來个電子信，講愛邀請同學轉去參加畢業典禮，正經係當有心。聽校長講，已多該屆个同學試著，無同大家共下在禮堂唱畢業歌，在校園肚共下結花翕相，都無像畢業。有影，有緣做同學，有當多讀書、打拚、搞寮个生趣回憶，係難得个情份，所以，學校特別安排在校慶該日，請大家著學生衫轉來參加典禮。

阿德有一個習慣，若係用毋著个東西，佢會遽遽處理撇，看係回收抑係擲撇，所以厰間房肚總係伶伶俐俐¹，無麼个舊个東西。這擺，愛尋出三年前个舊衫，根本都係兔角龜毛——無可能个事情。雖然學校也有分大家利便个選擇，著白色个面衫、烏色个長褲斯使得，毋過，大家還係會想尋轉該兜青春个印跡、珍貴个回憶。

做阿姆个人，都算係無講，也揣得著厰心思。佢先上網去尋

看看，哪位有賣成功高中个制服，電話聯絡好勢。想著圓身係圓个，用講个毋當用比个，尺寸好勢還愛繡學號上去，黏時帶緊阿德平常著个衫出發，一屑都儘採毋得，這斯係阿姆个愛，點點滴滴，來為子女設想。

該日打早，阿德暢喋喋著核新衝衝²个學生衫去學校，看著三年無見著个同學，除撇歡喜還係歡喜。大家共下翕相，講笑，湊緊去食晝，斯像讀高中該下。還有同學問起：「阿德，若學生衫仰還恁新，一屑烏跡都無？同印象中差當多呢？」知著係阿姆个用心了後，大家雖然感覺超過認真咧，還係當欣羨，原來時行个儀式感斯係恁泥啦！

一領學生衫使得分俵留存恁好个回憶，實在當值，盡重要个還分後生人了解，把握機會創造回憶，該種價值係用錢都買毋著个。

¹ 伶伶俐俐：音 langˋ langˋ liˋ liˋ；乾淨整齊。

² 新衝衝：音 sinˋ chungˋ chungˋ；很新的。

編號 10 號

【食飯个禮貌】曾雪蓉原作

有一句話講：「一方水土養一方人。」逐個所在都有自家个文化還有習慣。在恁多个風俗裡肚，「食」个禮貌文化使得講係生活裡肚盡重要个一部分。

還記得舊年，嫁去日本个滿姑，請吾等歸屋家人去厰屋家遠寮。到日本了後，食飯个時節，「山田」姑丈拿起酒杯，湍一杯酒分阿爸，湍好了後，姑丈同酒罐放在桌頂，斯笑咪咪看核阿爸，阿爸也對姑丈緊笑緊領頭，兩個人斯恁泥笑核相對看。過無幾久，滿姑看著咧斯講：「大哥，日本人在咁酒个時節，習慣係愛互相湍酒。頭下山田湍一杯酒分你，這下你也愛湍一杯酒分佢啦！」滿姑講撇了後，吾等正知原來係恁泥哦！阿爸遽遽湍一杯酒分姑丈，嘴項還緊用日本話講：「請、敗勢」；這種「做人客」尊重主人原旦个飲酒規矩，佢想斯係一種「食」个禮貌文化，也係老話講个：「入莊隨俗，入港隨灣」个生活表現。

「做人客」个時節，愛曉得尊重主人个習慣；「請人客」个時節，又愛仰脣做呢？

吾屋家有請印尼阿妹來搵照顧阿爹，這印尼阿妹厥名安做

「阿妮」。「阿妮」平常時當煞猛，除撇照顧阿爹，還會做衫褲。有一擺「阿妮妹」做一身已靚个衫裙分吾叔姆，吾叔姆為著愛答謝佢，斯請佢食飯。佢陪「阿妮」去隔壁叔姆屋家，一坐落去，看著桌頂有炆豬腳、豬腸炒薑絲，又有豬肚鹹菜湯，全係阿叔姆个手路菜，也係吾等食慣勢个客家味瑞，菜色正經當豐沛。毋過吾叔姆一下無想著「阿妮妹」係印尼人，佢無食豬肉。佢行去灶下同叔姆講，佢「唉喲」一聲，斯遽遽炒別項菜兜上桌。佢黏時斯想：「下次擺準講愛請人客，愛詳細注意人客敢有特殊个食飯習俗，正毋會好意變壞意來失人禮。」

「食飯个禮貌」係一個人好修養个表現，佢提醒自家在這方面毋好恁潦草，不管係分人請抑係請人客，定著愛做著「有禮有節」。